


TEZAU LITURGIC

24 IANUARIE

SLUJBA SF. CUVIOASE VALENTINA SULKOVSKAIA DE LA MINSK



MOSCOVA, 2000



Служба
святой блаженной
Валентине Минской
ВЕЛИКАЯ ВЕЧЕРНЯ

На «Господи, воззвах»: стихиры, глас 8-й:

Блаженная Валентино богомудрая, чистая твоя душа, еще с малых лет испытывавшая сладость молитвы пред Пречистым образом Богоматери, и ныне предстоящи пред лицом Святыя Троицы, испроси нам мир и велию милость.

Блаженная мати Валентино, восприявши болезнь от Бога всех врачевала и утешала еси приходящих к тебе с мольбою. Темже и нас не остави в напастех сущих от навет вражиих.

Глас 6-й:

Молитвенницу теплую видим тя, блаженная мати, мнозем бо людем к тебе притекающим, являеши в скорбех утешение, в недужех многоразличных исцеление, в нуждах сущим и страждущим присное вспоможение, и доньне в чудедействии не оскудеваеши.

Телесныя немощи побеждаючи, преуспеваючи возрастом и премудростию, созидаючи в себе

жилище Божие Духом, сподобилася еси, мати Валентино, созерцати горний мир, отонудуже и нам подаеши милость Божию.

Слава, глас тойже:

Селения святых наследовала еси, блаженная мати Валентино, во свете лица Божия, зриши нужды с верою притекающих к тебе, коемуждо потребная яже ко спасению подаючи. Сего ради и мы, на помощь твою уповающе, просим: моли Христа Бога, спастися душам нашим.

И ныне, Богородичен, глас 6-й: «Кто Тебе не ублажит...»

Вход. Прокимен дня и чтения 3 преподобническа.

НА ЛИТИИ стихира храма, и со стиховны.

Стихиры на СТИХОВНЕ, глас 5-й:

Имущи сердце твое присно обращенное ко Господу, исполнилася еси милости и сострадания, к ищущим спасения и утешения. Темже и ныне не престаеши благодетельствовати, подаючи молитвами твоими, мати Валентино, потребная ко спасению.

Стих: Праведницы во веки живут, и в Господе мзда их.

Достойно хвалима еси на земли, целительнице немощствующих, богоблаженная Валентино, яко и по кончине твоей усердно к тебе прибегающия от недуг свобождаеши. Темже непрестанно моли, спастися душам нашим.

Стих: Надеющиеся Нань разумеют истину и вернии в любви пребудут Ему.

Терпением житие твое украсившая, и уды умертвившая победила еси вражия прилоги, блаженная. Темже со всеми святыми славим, и торжествуем священную память твою, просяще обрести молитвами твоими велию милость.

Слава, глас 6-й:

Еже о нас исполнив смотрение, любовь земная с Небесными соединил еси, Господи, сице глаголя: идеже есмь Аз, тамо и слуга Мой будет. Веруем, яко и служка Твоя Валентина, во обителях святых молится, о еже пребывати нам с Тобою, Господи.

И ныне. Богородичен глас тойже:

Земля неоранная явилася еси, Мати Благословенная, возрастившая нам Класс живота, от Негоже всяк ядый не умирает, якоже рече, Богородительнице, всех Питатель.

ТРОПАРЬ глас 1-й:

От младенства восприявши веру Христову в сердце твое, / яко мудрая дева пронесла еси чрез все житие плоды ея, / темже и Христос дарова ти силу, / целити недуги немощствующих и колеблющихся. / Мы же, прославляюще тя, блаженная мати Валентино, вопием: // слава Давшему тебе крепость, / слава Прославльшему тя, // слава спасающему всех призывающих тя.

УТРЕНЯ

По 1-м стихословии СЕДАЛЕН, глас 6-й:

Терпением велиим житие твое украсивши и плоть духу покоривши, победила еси вражия прилоги, во смирении же и пощении Бога взыскавши, богоблаженная.

Слава, и ныне:

Молитвы рабы Твоея Валентины, прими, Богородице, и избави нас от всяких бед, яко родила еси Христа Спаса, Избавителя душ наших.

По 2-м стихословии СЕДАЛЕН, глас 8-й:

Приидите, вернии людие, днесь мати нашу Валентину благочестно восхвалим, истинную

угодницу Христову, вражия козни поправшую, ныне же со Ангелы ликовствующу и Христу непрестанно молящуюся, и с любовью той возопиим: не забуди нас, радости наша, мати блаженная Валентино, восхваляющих и чтущих священную память твою,

Слава, и ныне:

Призри на нас, недугующих, Всенепорочная, и исцели болезни наша душевныя вкупе же и телесныя, да возвеличим Тя, возвеличившую все человечество.

Величание:

Величаем тя, / святая блаженная мати наша Валентина, / и чтим святую память твою, / ты бо молиши за нас // Христа Бога нашего.

По полиелеи седален, глас 4-й:

Чудна явилася еси в терпении твоём, терпением и молитвою Христу угодила еси, блаженная Валентино, покоривши духу плотская мудрования, и избрала еси добрая, еже Богу работати. Сего ради Христос дарует благодать и милость молитвами твоими чтущим любовью святую память твою.

Слава, и ныне, Богородичен:

Теплое заступление сущим в бедах, и

Помощницу нашу Еюже от тли избавихомся,
Богородицу, вернии, всеусердно ублажаем.

Таже степенна, 1-й антифон 4-го гласа.

Прокимен, глас 4-й: Праведницы во веки
живут, и в Господе мзда их.

Стих: Надеющиеся Нань разумеют истину и
вернии в любви пребудут Ему.

Евангелие от Матфея, зачало 43.

По 50-м псалме СТИХИРА, глас 6-й:

Житие твое, яко солнце, сердца верных озари, и
многия ко стези покаяния приведе. Темже и нас
светом невечерним просвети, мати Валентино,
почитающих всечестную память твою.

КАНОН, глас 8-й:

ПЕСНЬ 1-я.

Ирмос: Воду прошед яко сушу и египетскаго зла
избежав, I Израильтянин вопияше: Избавителю
и Богу нашему поим.

Боже Всецедрый, сподоби ны, недостойныя,
принести молебное пение угоднице Твоей
Валентине, нашей ходатаице и молитвеннице
пред Тобою.

Закон Божий имущи в сердце своем издетска, уязвилася любовью ко Христу и Тому истово в житии своем служила еси, мати блаженная. Избра тя Господь сосуд Духа Святаго в земли Минстей утешати страждущих и немощных, притекающих к стопам твоим.

Богородичен: Архангельски песнь Тебе поем, Чистая: **Р**адуйся, Обрадованная Марие, Мати Христа Бога, присно молящаяся за род наш.

ПЕСНЬ 3-я.

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбче.

Житием богоугодным и праведным освятилася еси, мати блаженная, темже и нам, с верою к тебе прибегающим, помози благодати Божия исполнится.

Прозорливо усмотря кончину воинов, на поле брани убиенных, утешала еси вопрошавших тя. Жизнорадостно сретаючи из разных градов и весей приходящих к тебе страждущих в болезнях, исцеляла их, блаженная Валентино.

Богородичен: Небеснаго Творца, Богородице Всепетая, рождши, Небес пространнейшая

явилася еси. Нас от пространнаго пути погибельна уклоньши, на Небесный путь настави, молюся.

Седален, глас 2-й:

К тебе, блаженная мати Валентино, яко сильной молитвеннице пред Богом, притекаем, и просим исцеления недугом душевным и телесным, и вся потребная ко спасению.

Слава, и ныне, Богородичен:

Мати Пречистая, граде Божий, избави люди Твоя от бед, и помощь подаждь противитися врагом гордым, да вопием Ти: **Радуйся**, Благословенная.

ПЕСНЬ 4-я.

Ирмос: Слышах, Господи, смотрения Твоего таинство, разумех дела Твоя и прославих Твое Божество.

Сила Божия, в немощи совершающаяся, яви тя чудную помощницу, целительницу недужных и немощных, делательницу молитвы, поющу: слава силе Твоей, Господи.

Ум мой омраченный и страстьми телесными обуреваемый, твоими молитвами, блаженная мати, просвети и утиши, да выну воспою Господеви: слава силе Твоей, Боже наш.

Недостойными усты приносимое тебе убогое хваление наше, не презри, блаженная, но прими и воспевающих память твою молитвою посети да воспоем Богу: слава силе Твоей, Господи.

Богородичен: Услыши, Пречистая Владычице, моления наша, и избави нас от насилия вражия, и глас Христов, призывающий благословенныя в Царство, услышати сподоби.

ПЕСНЬ 5-я.

Ирмос: Просветил нас повелении Твоими, Господи, и мышцею Твоею высокою Твой мир подаждь нам, Человеколюбие.

Просвети нас, о мати Валентино, надеждою и любовью ко Господу, ныне бо зрящи Христа лицом к лицу, света неизреченнаго наслаждаешься, Тому за ны молися.

Христос тя озари Своим светом неизреченным в годину безбожную, тем и яви тя яко столп огнен, светяй во тьме, блаженная мати.

Яко звезда многосветлая возсияла еси, блаженная мати, указующи истинный путь на земном пути людем ищущим Правды Божией.

Богородичен: Свет рождшая божественный и Превечный, Богоневесто, разреши мглу прегрешений наших.

ПЕСНЬ 6-я.

Ирмос: Молитву пролию ко Господу, и Тому возвещу печали моя, яко зол душа моя исполнися, и живот мой аду приближися, и молюся яко Иона: от тли, Боже, возведи мя.

Призывающи имя Божие во спасение твое, спасению многих послужила еси. Да пребудем и мы в единении с Богом и в любви между собою, молимтися, мати Валентино.

Молитвою Небесною и по кончине твоей от недугов свобождаеши, целительнице наша безмездная, достойно хвалима еси на земли, молися о душах наших.

Молитву нашу прими, мати Валентино, да в умилении к честней иконе твоей припадем и недугов душевных и страстей телесных исцеление скоро примем.

Богородичен: Избавителя нашего неизреченно рождшая, Пресвятая Дево, буди нам грешным прибежище спасения и вечныя жизни Споручница.

Кондак, глас 5-й:

Ходатаица за немощствующих явилася еси, / на земли Минстей, блаженная Валентино, / в скорбех, бедах и напастех всех верных утешающи, / прозревающи болезни и недуги приходящих к тебе, / просим же и мы недостойнии, / твоего предстательства пред Престолом Всевышняго, // даровати нам мир и спасение душ наших.

Икос: На земли Минстей просияла еси, блаженная Валентино, и вси притекающи к тебе в скорбех, бедах и напастех обретают велие утешение, приносяще свои просьбы и воздыхания сердечная, получают облегчение и исцеления. Тем молим тя, мати наша, твоего непрестаннаго предстательства у престола Всевышняго во веки.

ПЕСНЬ 7-я.

Ирмос: От Иудеи дошедше, отроцы, в Вавилоне иногда верою Троическою пламень пещный попраша, поющее: отцев Боже, благословен еси.

Возгорися нечестие на земли нашей, веру отеческую в людех тщащеся поपालити, ты же, блаженная, приходящих к тебе научала еси верою воспевати: отцев Боже, благословен еси.

Богопротивнии мучителие, от закона Божия отступльшии, храмы разрушиша, но ты, блаженная Валентино, утешала приходящих к тебе и подвигала еси пети: отцев Боже, благословен еси.

Страждущим людем во дни нечестия молитвами твоими, от злобожнаго языковредия неврежденным быти споспешествовала еси, научивши взывати: отцев Боже, благословен еси.

Богородичен: Отроковице Дево, простри на нас милость Сына Твоего, да кромешныя тьмы избавимся мольбами Твоими, поюще: благословен еси, Господи Боже, во веки.

ПЕСНЬ 8-я.

Ирмос: Царя Небеснаго, Егоже поют вои Ангельстии, хвалите и превозносите во вся веки.

Победительница страстей явилася еси, Валентино, всякая искушения вражия побеждающи и непрестанно поющи: благословите, вся дела Господня, Господа. Царя Небеснаго измлада возлюбила еси, и Тому до конца дний своих со усердием служила еси, блаженная. Ныне же с лики ангельскими присно поеши: благословите, вся дела Господня, Господа.

Мнози людие, пленении безбожием, молитвами твоими, блаженная мати, на путь спасения наставила еси, дабы в вере правей воспевали Богови: благословите, вся дела Господня, Господа,

Богородичен: Победе во бранех духовных верным пособствуеши, Пресвятая Дево, темже и всем к Тебе притекающим помощь Твою низпосли, да выну поем: благословите, вся дела Господня, Господа.

ПЕСНЬ 9-я.

Ирмос: Воистину Богородицу Тя исповедуем, спасении Тобою, Дево Чистая, со безплотными лики Тя величающее.

На одре болезни лежащи, имела еси, Валентино, смирение, кротость, веру несумненну, надежду и любовь, яже к Богу, и нас сего сподоби, да с тобою Христа присно величаем.

По гласу Божию: претерпевый до конца, той спасен будет, ты, блаженная Валентино, исполнила еси закон Господа и ныне во славе предстоиши и величаеши присно Господа.

Приими наше недостойное моление, Валентино блаженная, и ходатайствуй пред Господем за всех чтущих тя, да с тобою сподобимся в селениях райских славить Святую Троицу.

Богородичен: Мати Божия, Сияние
Неизреченнаго Света, стопы наша к жизни
вечней направи, прощающи вся злая, нами
содеянная.

Светилен:

Якоже солнце светоносно возсия ныне,
блаженная мати Валентино, память твоя, и
озари землю Белорусскую светом неизреченным,
дабы вси вернии прославляли Великаго Бога
Отца, и Сына, и Святаго Духа.

Слава, и ныне, Богородичен:

Державным Твоим покровом, Пречистая, нас
рабов Твоих, от наветов вражиих сохраняй
всегда невредимы, Тя бо едину стяжахом
надежду и утверждение.

На ХВАЛИТЕХ стихиры, глас 8-й:

Приидите, вернии, блаженную Валентину вси
согласно восхвалим, яже в житии своем
попечение изрядное о людях показа, и ныне
прибегающим к ней благодатная деяния являет,
таже в лице святых водворяющися, престолу
Божию присно предстоит и молится о спасении
душ наших.

В терпении страдания своя яко иго Христова
светло пронесла еси, блаженная мати, и Христос
тебе дарова дар недуги исцеляти и спасати всех

притекающих к молитвам твоим.

Присно в молитве пребываючи, благодати Божия исполнишия, многая люди недужныя телом, здравы сотворила еси, таже противу сил вражиих, досаждающих душам человеческим, воительница дерзновенная воистину показалася еси, Валентино блаженная.

Слава, глас 8-й:

Днесь край Минский, просвещается, Валентино, твоими зарями, и земля веселится цветы украшаема, людие же Божии вопиют: не престай молиться о всех, празднующих любовию святую память твою.

И ныне, глас 8-й:

Владычице, прими молитвы раб Твоих и избави нас от всякия нужды и печали.

Великое славословие, ектении и отпуст.

